



S E R M O N  
CINQVIESME

SVR L'EPISTRE AVX  
HEBREUX, CHAP. 1. VERS. 3.

*Lequel estant, &c, s'est assis à la dextre  
de la Majesté es lieux tres-hauts.*



Q u s oyons volontiers, mes  
freres, le recit de la magnificen-  
ce des Roys de la terre & de  
leurs triumphes, bien que cette  
magnificence là ne nous concerne point, &  
qu'il ne nous en reuiène aucun profit, la seule  
beauté de la chose attirant à soy nos esprits  
& nostre attention: A plus forte raison de-  
uons nous prendre plaisir en la deduction  
de la magnificence & du triomphe de Iesus  
Christ, laquelle surpasse infiniment toute  
celle des Roys de la terre, & de laquelle

nous vient vne souueraine felicité & gloire. Iesus-Christ estant nostre frere aîné & nostre chef, en la personne duquel nous mesmes nous trouuons triompher és lieux celestes.

L'Eglise d'Israël entre ses Pseaumes & Cantiques en auoit vn expres, à sçauoir le 68. pour reciter de siecle en siecle iusques à la venue du Christ, le triomphe de l'Arche de l'Alliance quand on l'esleua sur la montagne de Sion, là où ils contemploient Dieu mesme triomphât de leurs ennemis & choisissant la montagne de Sion pour le lieu de sa gloire & de son repos. Or vous sçauiez que tout ce triomphe là n'estoit qu'ombre & figure de ce qui nous est proposé en l'Euan-gile, selon que l'Arche de l'Alliance estoit ombre & figure de Iesus-Christ, les ennemis charnels d'Israël figure de nos ennemis spirituels, & la montagne de Sion figure du Ciel, là où Iesus-Christ le Mediateur, apres auoir despoüillé les principautez & puissances en sa croix, est allé se seoir comme en lieu de repos & de gloire: dont aussi l'Apostre Eph. 4. applique à Iesus-Christ ce qui estoit dit au Ps. 68. tu es monté en haut, tu as emmené des prisonniers, & as pris des dons pour les distribuer entre les hommes.

Si doncques l'Eglise d'Israël chantoit avec tant d'allegresse ce qui ne concernoit que les ombres & les figures, combien deuons-nous mediter avec ioye ce qui nous en propose le corps & la verité mesme?

Nous oyons avec consolation les combats que Iesus-Christ a soustenus & l'humiliation qu'il a subie pour nous, pource que ces combats ont esté suivis de la victoire, & l'humiliation de l'exaltation : autrement ou seroit nostre esperance, si Iesus-Christ fust demeuré dans les combats & dans l'aneantissement? Combien plus grande doncques doit estre nostre ioye de mediter immediatement le triomphe & la gloire? Car si nous nous auons veu nostre salut dans les playes & dans l'effusion du sang de Iesus-Christ, combien plus en prendrons nous d'assurance dans sa vie & dans l'estat de sa gloire à la dextre de la Majesté de Dieu? selon que dit l'Apostre Rom. 5. que si nous auons esté reconciliez à Dieu par la mort de son Fils, beaucoup plus serons nous sauuez par la vie d'iceluy.

C'est donc cet estat de gloire que nous auons à considerer maintenant, quand l'Apostre dit que Iesus-Christ s'est assis à la dextre de la Majesté és lieux tres-hauts : ce qui

a esté le but de son propos, à sçauoir de ce qu'il a dit que Iesus-Christ est la resplendeur de la gloire du Pere & la marque engraüée de la personne d'iceluy, qu'il soustient toutes choses par sa parole puissante, & qu'il a fait la purgation de nos pechez par soy-mesme: car il n'a mis en auant ces choses que pour monstrier que Iesus-Christ estoit capable d'estre assis à la dextre de Dieu & qu'une telle gloire luy conuenoit, veu que (côme nous vous auons remarqué cy-dessus) il n'a pas dit que Iesus-Christ est la resplendeur de la gloire du Pere, qu'il soustient toutes choses, qu'il a fait la purgation de nos pechez; mais *qu'estant* la resplendeur de la gloire du Pere, & *soustenant* toutes choses, & *ayant fait la purgation* de nos pechez par soy-mesme, il s'est assis à la dextre de la Majesté és lieux tres-hauts: Car il faut remarquer que selon nostre Apostre la seance à la dextre de Dieu est vne gloire diuine incommunicable à la creature, comme il appert de ce qu'il dira cy-apres, *Auquel des Anges a-il oncques dit sieds-toy à ma dextre?* Et partant en alleguant que Iesus-Christ par son estre auoit des-ja vne gloire diuine, estant la resplendeur de la gloire du Pere, & auoit vne vertu infinie soustenant toutes cho-

*l'Ep. aux Hebr. chap. 1. vers. 3.*

ses par sa parole puissante, & ayant fait la purgation de nos pechez par soy-mesme, il fait voir qu'il a esté conuenable qu'il obtinst l'estat d'une gloire diuine.

Et ce qu'il monstre cette gloire diuine en Iesus-Christ est pour le releuer par dessus tous ceux par lesquels Dieu auoit parlé auparauant, & par ainsi mettre l'Euangile par dessus de toutes les reuelations de l'ancien Testament, selon qu'il a commencé son propos par ces mots, *Dieu ayant a plusieurs fois & en diuerses manieres parlé aux Peres par les Prophetes, a parlé à nous en ces derniers iours par son Fils.* Les Prophetes finissoient par la mort le cours de leur ministere; & estoient reduicts au sepulchre avec leurs peres: mais cettuy-cy par lequel Dieu a parlé à nous, en quittant la terre de sa presence corporelle, est monté sur le throne de Dieu pour de là nous continuer ses enseignemens diuins, & regner sur l'vniuers. Et pour faire l'opposition entiere selon les termes de l'Apostre, Ceux par lesquels Dieu parloit iadis n'estoient que seruiteurs, celuy par lequel il a parlé à nous en ces derniers iours est le Fils & heritier de toutes choses: Ceux-là n'estoient que créatures, mais cettuy-cy est celuy par lequel Dieu a fait les siecles: Ceux-là estoient

K

hommes abjects; mais cettuy-cy est la resplendeur de la gloire du Pere, & la marque engrauee de sa personne: Ceux-là estoient creatures infirmes, mais cettuy-cy soustient toutes choses par sa parole puissante: Ceux-là tançoient le peuple de leurs pechez, & ne les en pouuoient purger, seulement en promettoient la purgation par autrui, mais cettuy-cy a fait la purgation de nos pechez par soy mesme; Bref, ceux-là estoient reduits au sepulchre avec leurs peres sous la puissance de la mort iusqu'au iour de la resurrection glorieuse; mais cettuy-cy, mesme en corps, est assis à la dextre de la Majesté es lieux tres-hauts.

Or en ces paroles nous considererons deux poincts, à sçauoir,

Premierement, Quelle est la gloire de la seance de Iesus-Christ à la dextre de Dieu.

Secondement, Quel est le fruit qui nous en reuient.

## I. POINCT.

La dextre de Dieu en l'Ecriture sainte signifie ordinairement, ou la vertu & puissance de Dieu, ou sa faueur; mais pour sçauoir que c'est qu'estre assis à la dextre de

Dieu, il ne faut pas regarder à cela, mais à la phrase entiere de *seoir à la dextre*, laquelle est prise de la coustume des Anciens Roys qui mettoient à leur main droïste ceux auxquels ils donnoient le premier degre d'honneur ou de puissance auprès d'eux. Cela se voit en l'histoire de Salomon, au chapitre second du premier livre des Roys, où il est recité que quand Salomon fut assis sur le throne, & que sa mere vint pour luy faire vne requeste, *il luy fit mettre un siege à sa main droïste* : & suiuant cette coustume il est dit à Salomon au Psaume 45. que sa femme *est à sa main droïste* parée d'or d'ophir, c'est à dire qu'elle a le premier rang & degre d'honneur apres luy. En saint Matth. 20. la mere des enfans de Zebedée (s'imaginant que Iesus-Christ regneroit à la maniere des Monarques mondains) demande à Iesus-Christ que ses enfans *soient assis l'un à sa main droïste, l'autre à sa gauche*, c'est à dire, qu'ils ayent les premieres places d'honneur auprès de luy, & par consequent les premieres charges & dignitez en l'admini-  
tion de son Royaume : tellement que selon cela (encor que Dieu n'ait ny main droïste ny main gauche, estant d'une nature spirituelle & infinie) celuy est assis à la dextre du

Pere qui a la première dignité aupres du Pere & l'autorité d'administrer son empire, pour estre comme le Lieutenant du Pere en son regne; Ainsi par cette façon de parler le Pere est représenté comme vn Monarque terrien qui feroit seoir quelqu'un à sa main droite pour luy transmettre son autorité en l'administration de son Royaume, comme l'Apostre au quinzième de la premiere aux Corinth. apres avoir allegué ces mots, *Le Seigneur a dit à mon Seigneur, Sieds-toy à ma dextre iusqu'à tant que i'aye mis tes ennemis pour marchepied de mes pieds*, les explique par ceux-cy, *il faut qu'il regne iusqu'à tant que ses ennemis soient mis pour marchepied de ses pieds*. Or cy-deuant nous vous auons parlé de la seigneurie & du droit que Iesus-Christ a sur toutes choses, à sçauoir quand nous auons expliqué ces mots, que Dieu l'a estably heritier de toutes choses. C'est pourquoy nous ne nous y arresterons pas; seulement nous vous ramenteurons qu'il ne s'agit pas icy du regne par lequel le Fils regnoit sur toutes choses comme Dieu avec le Pere; mais du regne qu'il exerce comme Mediateur, comme Lieutenant du Pere: Regne, lequel l'Apostre dit 1. Cor. 15. qu'il remettra au Pere, apres que l'Eglise aura

esté toute recueillie au Ciel par la resurre-  
ction glorieuse, & que tous les ennemis de  
l'Eglise auront esté totalement destruits.  
Car côme il n'a obtenu cet empire que pour  
son Eglise, lors que l'Eglise sera totalement  
paruenue à son but, cet empire n'aura plus  
de lieu. Nous disons donc que Iesus Christ  
est assis à la dextre de Dieu en la qualité de  
Mediateur, selon laquelle il s'estoit reuestu  
de nostre nature humaine, & auoit souf-  
fert la mort pour l'expiation de nos pechez,  
comme nostre Apostre le monstre icy, di-  
sant, que Iesus - Christ ayant fait la pur-  
gation de nos pechez par soy-mesme, s'est  
assis à la dextre de la Majesté. Comme  
Mediateur il auoit pris forme de serui-  
teur, & auoit esté mis entre deux brigands:  
& comme Mediateur il a esté mis à la dex-  
tre de la Majesté: Comme Mediateur il s'est  
abbaisé iusqu'aux plus bas lieux de la ter-  
re, & comme Mediateur il est assis à la  
dextre de Dieu es lieux tres-hauts; c'est pour-  
quoy il ne demandoit cette gloire qu'apres  
l'œuure de nostre redemption acheuée, Pere,  
dit-il, en saint Iean 17. *ie s'ay glorifié sur la  
terre, i'ay paracheuè l'œuure que tu m'as  
baillée à faire, & maintenant toy Pere, glo-  
rifie moy enuers toy-mesme de la gloire que*

*i'ay eue pardeners toy deuant que le monde  
fust fait.* Paroles par lesquelles il deman-  
de de iouyr en la nature humaine & en la  
qualité de Mediateur, de l'estat de gloire, du-  
quel l'œuvre de nostre salut auoit requis l'in-  
termission. Or saint Paul nous represente  
quel est cet estat, disant, *Il s'est abbaissé soy  
mesme & a esté obeyssant iusques à la mort,  
voire la mort de la croix ; pour laquelle  
cause Dieu l'a souuerainement esleue , &  
luy a donné vn nom qui est sur tout nom, a-  
fin qu'au nom de Iesus-Christ tout genouil  
se ploye de ce qui est es Cieux & en la terre  
& dessous la terre, & que toute langue con-  
fesse que Iesus-Christ est le Seigneur à la  
gloire de Dieu le Pere.* Iesus-Christ auoit  
bien tousiours eu vne excellence d'estre par  
dessus toutes les creatures, mais non pas vn  
excellence d'estat, puis qu'il auoit esté ab-  
baissé iusqu'à la mort de la croix. Le voicy  
donc maintenant quant à son estat dans la  
gloire que son estre diuin requeroit: le voila,  
ps. 12 v. 7. apres auoir esté fait vn ver & non vn hom-  
me, l'opprobre des hommes & la honte du  
peuple, assis sur vn throne deuant lequel tout  
genouil se ploye: le voila apres auoir esté  
pour vn peu de temps fait moindre que les  
Ange, estably chef & prince de toute prin-

*l'Ep. aux Hebr. chap. 1. vers 3.* 151  
 cipauté & puissance. Et sont remarquables  
 en nostre texte les termes par lesquels l'A-  
 postre veut exprimer la grandeur de cette  
 exaltation : car l'Apostre ne dit pas simple-  
 ment que Iesus Christ s'est assis à la dextre  
 de Dieu, mais à la dextre de *la Majesté*; c'est  
 le mot qui est employé par saint Iude, quand  
 il dit, à Dieu seul sage soit gloire & *magnifi-  
 cence maintenant & à tout iams*. Magnifi-  
 cence & Majesté, à comparaison de laquelle  
 tout ce qui est de grand & de splendide entre  
 les hommes n'est que bassesse & obscurité,  
 voire tout ce qui est de grand entre les Ar-  
 changes & les thrones n'est que petitesse.  
 Secondement l'Apostre dit que Iesus Christ  
 est assis à la dextre de cette Majesté *es lieux  
 tres-hauts* : pour nous apprendre qu'il n'y a  
 rien de si grand, si majestueux, & si haut en-  
 tre les creatures qui ne soit subinis à Iesus-  
 Christ ; comme au premier de l'Epistre aux  
 Ephes. il dit, *Dieu a fait seoir Iesus-Christ  
 à sa dextre es lieux cestes, par dessus toute  
 principauté & puissance & vertu & sei-  
 gneurie, & par dessus tout nom qui se nom-  
 me non seulement en ce siecle, mais aussi en  
 celuy qui est à venir* ; c'est à dire non seule-  
 ment au monde entre les hommes, mais  
 aussi entre les Anges avec lesquels nous

viurons & que nous cognoissons au siecle à venir. Les Roys & Princes de la terre ont l'honneur que Dieu les ait comme mis à sa main droicte icy bas, c'est à dire les ait establis pour ses Lieutenans enuers les hommes pour regner sur eux. Mais voicy Iesus-Christ à la dextre de la Majesté, non pas en la terre, mais au Ciel, & par consequent au dessus de toute Majesté humaine, à sçauoir de tous Roys & Princes de la terre. Les Archanges, les Trones, Principautez, Dominations & Puissances sont les Chefs & Princes de l'Estat Angelique, auxquels des milliers d'Anges sont soumis: mais voicy Iesus-Christ à la dextre de la Majesté, non simplement au Ciel, mais es lieux les plus hauts du Ciel, & par consequent au dessus des Thrones, Puissances & Dominations Angeliques. Remarquons aussi par ces mots de *lieux tres-hauts* qu'il n'y auoit point de throne & de demeure icy bas que trop inferieure à la condition de Iesus-Christ. Ce Roy estoit vn Roy celeste, il estoit non de la terre mais du Ciel (selon que dit l'Apostre 1. Cor. 15. opposant Iesus-Christ à Adam, que ce second homme est du Ciel) il luy falloit donc vn Paradis celeste, non vn terrestre cōme au premier hom-

me. Son Royaume aussi estoit appelé *Royaume des Cieux*, pour le discerner d'auec les Royaumes terriens de Dauid & de Salomon, voire d'auec la seigneurie & domination qui auoit esté donnée à Adam en la terre.

Ainsi a esté vrayement accomplie la Prophetie du Ps. 8. rapportée par nostre Apostre Hebr. 2. laquelle par le premier homme regardoit le second, *Tu l'as fait un petit moindre que les Anges, tu l'as couronné de gloire & d'honneur, & l'as estably sur les œuvres de tes mains. Tu as assubjetty toutes choses sous ses pieds.* Car il appert bien que pour auoir toutes choses assubjetties *sous ses pieds*, il falloit estre assis à la dextre de Dieu, au dessus de toutes choses: & non pas estre en la terre comme y estoit le premier homme, où par consequent il auoit au dessus de soy, l'air, les Cieux & les Anges, bien loin d'auoir toutes ces choses assubjetties sous ses pieds, ainsi que les a IesusChrist le second Adam, dont le premier en sa gloire n'a esté par consequent qu'une ombre & figure.

Or cōme le premier hōme lors qu'il auoit assujetties sous soi toutes les creatures de la terre, les oyseaux du Ciel, & les poissons de la

mer, & n'auoit rien en toute l'estenduë de la terre qui lui cōtrariaist, n'a esté qu'une ombre de la gloire de Christ à la dextre de Dieu. De mesme toute la magnificēce & la splendeur de Salomon laquelle la Reyne de Scebba vint contempler de si loin, & laquelle elle trouua au dessus de tout ce qu'elle en auoit entendu, n'en a aussi esté qu'une petite ombre: Les milliers d'hommes seruans Salomon sont vn bien petit nombre à comparaison des Anges qui sont autour de Iesus-Christ & de son throne par millions; mille milliers le seruent, & dix mille millions assistent deuant luy, ainsi qu'en parle l'Escripture. A l'entour du throne, dit saint Iean, estoit dix mille fois dix mille, & mille fois, mille, & ils disoient à haute voix, digne est l'Agneau qui a esté occis de receuoir puissance, richesse, & honneur & gloire.

Telle estant la magnificence de la Cour celeste de ce Roy, à la dextre de Dieu, iugez qu'elle doit estre la resplendeur & la gloire de sa personne: Je puis dire que la splendeur du Soleil que vous voyez de vos yeux en sa plus grande force n'est qu'obscurité à comparaison de la gloire & resplendeur de Iesus-Christ dans les Cieux: Et certes c'est pour cela que les Seraphins couurent leurs

faces de leurs aisles deuant luy, n'en pouuans supporter l'esclat : Et maintenant cette gloire remplit tellement la nature de Iesus-Christ qu'elle surpasse tout ce que nous en pouuons conceuoir. Et certes si mesmes en la terre Iesus-Christ pendant la transfiguration, qui ne fut qu'un eschantillon de la gloire qu'il a dedans le Ciel, eut sa face resplendissante comme le Soleil, & ses vestemens deuindrent blancs comme la lumiere, quelle doit estre sa gloire en sa perfection & plenitude dedans le Ciel ?

Voila, ô fideles, la magnificence & gloire de Iesus-Christ nostre Mediateur à la dextre de Dieu, 1. en sa personne, 2. au lieu de sa demeure, 3. en ses seruiteurs & assistans, 4. en l'vniuersalité de son empire comprenant les Cieux & la terre & toutes les creatures, Anges, hommes, elemens, foudres, vents, sans exception quelconque; tout cela dependant de sa volonté absolument, 5. en l'adoration que luy rendent les hommes & les Anges, thrones, dominations & puissances: A quoy adioustez en sixiesme lieu la recognoissance & submission de ses propres ennemis, selon que dit l'Apostre, qu'il faut qu'au nom de Iesus tout genouil se ploye de ceux qui sont au Ciel & en la

terre & deffous la terre, comme nous l'auons ouy cy deffus: de sorte que les hommes qui auiourd huy ne le cognoissent point & le blasphemement, vn iour confesseront qu'il est le Seigneur à la gloire du Pere, & ceux-là mesmes qui l'ont percé le verront en sa Majesté glorieuse, & se lamenteront abbatus & prosternerz deuant luy. Ainsi Iesus-Christ qui estoit la resplendeur de la gloire du Pere & la marque engraüée de sa personne par sa generation eternelle, se trouue estre aussi la resplendeur de la gloire du Pere en cette sienne condition, & en ce sien estat de la seance à la dextre de Dieu.

Que cette grande gloire, mes freres, nous fasse admirer la grandeur de son amour, d'auoir voulu s'en priuer à temps pour l'oeuvre de nostre salut: car c'est la gloire qu'il auoit pardeuers le Pere deuant que le monde fust fait, comme nous auons ouy qu'il le dit Iean 17. Quel amour donc d'auoir voulu d'une si haute & si sublime condition descendre si bas pour nous, que de venir subir la mort, voire la mort de la croix?

Mais aussi que cette gloire donnée à Iesus-Christ en vne autre qualité qu'il ne

l'auoit eue auparauant, à sçauoir en qualité de Mediateur, & de Fils de l'homme, selon que Iesus-Christ dit Iean 5. que le Pere a donné tout iugement au Fils *entant qu'il est Fils de l'homme*; nous fasse admirer, combien le Pere celeste auoit d'affection à l'œuvre de nostre redemption, de l'auoir remunerée si amplement, selon que dit S. Paul Philipp. 2. *pource qu'il s'est abbaissé, Dieu l'a souverainement eslé.* O combien a esté ardente la charité du Pere pour nostre salut! puis qu'il a desployé tous les thresors de sa gloire pour en recompenser celui qui nous l'a acquis au prix de son sang & de son aneantissement; & qu'il a eslé la nature humaine, la creature, qui dans la personne de son Fils auoit esté l'organe de ce salut, à la gloire d'un estat diuin dans la mesme personne; les Anges & Archanges se prosternans deuant elle.

Remarquez encor, mes freres, cet amour en ce qu'esleuant Iesus-Christ à sa dextre, & assubjectissant toutes choses sous les pieds d'iceluy, *il l'a donné sur toutes choses pour estre chef à l'Eglise*, comme le dit l'Apostre Ephes. 1. Non seulement c'est à nostre occasion que Dieu a donné à Iesus-Christ toute cette gloire, mais il la luy a en-

cor donnée pour nostre profit & pour nostre gloire: Pour nostre profit, car estre chef à l'Eglise, est en auoir la conduicte & la protection & luy departir tout ce qui est necessaire. Et de faict vous voyez sa conduite & sa beneficence, en ce qu'estant monté en haut il espend son esprit & ses graces sur son Eglise, & donne les vns pour estre Apostres, & les autres pour estre Prophetes, & les autres pour estre Euangelistes, les autres pour estre Pasteurs & Docteurs pour l'œuvre du ministere. Vous voyez aussi sa protection, en ce que peu apres il se monstre du Ciel à saint Estienne quand on le lapidoit, pour le fortifier & receuoir son esprit en ses mains: & il monstre à Paul quel interest il prenoit pour la deffence de son Eglise luy disant, Saül Saül pourquoy me persecutes-tu? Je dy aussi pour nostre gloire, puis que celuy qui est ainsi exalté est nostre chef & nous son corps mystique, & que la nature humaine esleuée en luy à la dextre de Dieu, est celle par laquelle nous sommes sa chair & ses os, comme aussi l'Apostre regarde à cét argument de gloire & de consolation, quand ayant dit que Dieu a donné sur toutes choses Iesus-Christ pour estre chef de l'Eglise, il adioust, *laquelle est le*

*corps d'iceluy & l'accomplissement de celuy qui accomplit toutes choses en tous. Car si nous sommes son corps, nous iouyffons donc en luy de cette gloire; & si nous sommes son accomplissement, il ne se reputera point accompli, iusqu'à ce qu'il ait esleué son Eglise à la participation de cette gloire: car n'en est-ce pas, ie vous prie, vne participation, quand Iesus-Christ dit Apoc. 2. & 3. que celuy qui vaincra il le fera seoir avec soy en son throne, comme il a vaincu & est assis avec le Pere en son throne; & qu'il luy donnera puissance sur les nations, & qu'il les gouvernera avec vne verge de fer?*

## II. POINCT.

Mais pour voir plus particulierement le profit qui nous reuiet de cette exaltation de Iesus-Christ à la dextre de Dieu, considerons particulierement trois choses, 1. le poids de ces mots, estre assis à la dextre de Dieu : 2. les esgards selon lesquels l'Apostre dit que Iesus-Christ est assis à cette dextre, à sçauoir comme estant la resplendeur de la gloire du Pere, comme souuerainement toutes choses par sa parole puissante, & comme ayant fait la purgation de nos

pechez par soy-mesme : Et en troisieme lieu, nous considererons la circonstance du lieu és mots de *lieux tres-hauts*.

Quant à la premiere, puis que S. Paul 1. Cor. 15. explique seoir à la dextre par *regner*, contemplons cette Ascension à la dextre de Dieu, comme le iour de son sacre, & y voyons l'accomplissement de ce qui estoit dit Ps. 2. *J'ay sacré mon Roy sur Sion montagne de ma sainteté : Demande moy & ie te donneray pour ton heritage les nations.* Et certes si les Roys au iour de leur sacre font des grandes largesses, voyez ce Roy celeste espendant du Ciel en la terre les graces du saint Esprit, & remplissant l'Eglise de ses dons, selon qu'il est dit *estant monté en haut il a donné des dons aux hommes.* Pourtant rapportons à ce regne tout ce que nous trouuerons de tesmoignages de ioye & d'allegresse dans les Prophetes pour le regne de Dieu. Car cela regardoit le regne du Messie, duquel Esaïe auoit dit, *l'Enfant nous est né, le Fils nous a esté donné, l'Empire a esté mis sur son es-paule : & le Prophete Ps. 45. Ton throne à Dieu est à tousiours & le sceptre de ton regne est un regne d'equité. O Dieu ton Dieu t'a oint d'huyle de liesse par dessus tes consors.*

*l'Ep. aux Hebr. chap. 1. vers. 3.* 161  
consors. Et icy disons avec le Prophete Ps.  
97. *L' Eternel regne que la terre s'en esgaye,*  
*que maintes isles s'en resiouyssent, nuee &*  
*obscurité sont à l'entour de luy, injustice & in-*  
*gement sont l'assiette de son throne.* Voyez  
icy vostre seureté, fideles, contre tous en-  
nemis & tous maux. Il n'y en a aucun sur  
lequel Iesus-Christ ne regne, & qu'il ne  
mette sous ses pieds ; que craindrez-vous  
donc ? Vostre Roy, mes freres, n'est plus  
és prises avec vos ennemis, il est assis vi-  
ctorieux & triomphant à la dextre de Dieu ;  
& comme il les a vaincus par le combat de  
la Croix, il les va maintenant par sa seance  
à la dextre mettant pour marchepied de ses  
pieds. Toy donc qui vois Sathan & le mode  
conspirant contre l'Eglise, assure-toy, puis  
que le Roy de l'Eglise est monté triomphant  
à la dextre de Dieu. Que peuuent faire, ie  
vous prie, nos ennemis contre le regne de  
Iesus Christ, puis qu'il est sur vn throne ce-  
leste & dans l'estat de son triomphe ? Celuy  
qui reside és Cieux se mocquera d'eux, il  
parlera à eux en sa cholere & les rendra es-  
perdus en sa fureur.

Regarde aussi, fidele, à ce throne & y leue  
continuellement tes yeux, afin que tu ne  
laisses plus regner le peché & ses conuoiti-

ses en toy : T'assubjetirois-tu à vn autre regne que celuy de Iesus-Christ, voire re-  
 ceurois-tu son ennemy le peché, & les con-  
 uoitises charnelles pour regner sur ton cœur  
 & tes affections? C'est donc icy qu'à lieu  
 ce que dit l'Apostre Rom. 6. *Que le peché*  
*ne regne point en vostre corps mortel pour*  
*luy obeyr en ses conuaitises.* Car que nous  
 seruira-il que Iesus-Christ regne dans les  
 Cieux, s'il ne regne dans nos cœurs? qu'il  
 ait puissance sur les vents & les tempestes, &  
 sur les elemens, s'il n'a puissance sur nos af-  
 fections? & que nous seruira-il qu'il triom-  
 phe là haut dedans le Paradis, si icy bas les  
 vices & les pechez nous tiennent captifs &  
 nous meinent en triomphe?

Viennent en second lieu, pour consi-  
 derer le fruit que nous apporte cette sean-  
 ce à la dextre, les trois esgards que nostre  
 Apostre a proposez en ce texte, à sçauoir  
 que Iesus Christ s'est assis à la dextre de  
 Dieu, 1. estant la resplendeur de la gloire du  
 Pere; 2. soustenant toutes choses par sa paro-  
 le puissante; 3. ayant fait la purgation de nos  
 pechez par soy-mesme.

Comme la resplendeur de la gloire du Pere,  
 ce qu'il a esté esleué au Ciel, est pour de là  
 illuminer son Eglise, comme quād Dieu for-  
 ma le Soleil & le mit dans le Ciel, ce fut

pour de là esclairer l'vniuers. Et pourtant par la seance de I. Chr. à la dextre de Dieu nous deuons considerer le Soleil de iustice & de grace esleué sur nostre hemisphere pour dissiper desormais routes tenebres. L'aduouie qu'il y a eu de la lumiere en l'Eglise auant l'Ascension de Iesus-Christ au Ciel, comme auant le quatrième iour de la creation, il y auoit de la lumiere sur le terre: mais ie dy que comme lors que Dieu au quatrième iour crea le Soleil, la lumiere fut plus grâde: aussi la lumiere de l'Eglise a esté beaucoup plus grande quand Iesus-Christ qui estoit la resplendeur de la gloire du Pere a esté esleué à la dextre de Dieu. Tesmoin en soit la iournée de la Pentecoste, en laquelle l'enuoy de son Esprit, a esté vne diffusion de sa lumiere & de ses rayons pour l'illumination des peuples & nations de la terre. C'est icy, ô Ierusalem, qu'a vn grand accomplissement la prediſtion d'Esaïe, *Leue toy sois illuminée, car ta lumiere est venue & la gloire de l'Eternel s'est leuée sur toy.* Lors de cette seance, ô Eglise de Dieu, a esté dressé és Cieux vn pauillon pour ton Soleil, afin que par le ministere de l'Euan-gile son depart soit de l'vn des bouts des Cieux iusques à l'autre, & qu'il n'y ait rien

qui se puisse cacher arriere de sa chaleur:  
Et certes Dauid au Ps. 19. parle du Soleil en  
ces termes, pour vous monstrier qu'il regar-  
de aussi prophetiquement à vn Soleil mysti-  
que. Ton soleil, ô fidele, n'est plus icy  
bas enuelpé des tenebres espaisées de la  
croix & de l'ombre de mort, comme il a esté  
quelque temps. Il a esté esleué tout res-  
plendissant à la gloire de Dieu, & a mis en  
lumiere la vie & l'immortalité par l'Euangi-  
le: Esjouy-toy donc contre l'ire de Dieu, le  
peché, les aduersitez, & la mort: Contre l'ire  
de Dieu, car si nostre iustice & nostre paix a  
esté dans l'obscurité, maintenant elle est  
resplendissante comme le midy, mainte-  
nant s'accomplira ce que dit Esa. au chap.  
58. au fidele, *ta lumiere s'esclorra comme  
l'aube du iour, & ta guérison germera in-  
continent: ta iustice ira deuant toy & la  
gloire de l'Eternel doit estre ton arriere-  
garde.* Si tu doutes maintenant de ta iusti-  
fication tu ramenes Iesus-Christ d'enhaut,  
tu le mets encor dedans les tenebres du se-  
pulchre & de la mort. Or il te dit qu'il est  
l'estoile resplendissante & matiniere; & Za-  
charie t'enseigne que cét Orient d'enhaut  
luit à ceux qui sont assis en tenebres & en  
ombre de mort: l'obscurité de la montagne

de Sinai & ses espais nuages, symboles de l'ire du Seigneur & de nostre misere, sont dissipez par ce Soleil que Dieu a esleué sur la Sion celeste. Arriere les doutes & les frayeurs, puis que voicy la lumiere & la vie en lieu si eminent. Ne sois point en peine ô Chrestien, de chercher quelque lumiere contre tes pechez, & de recourir aux creatures, puis que voicy la resplendeur de la gloire, c'est à dire de la misericorde & charité du Pere & de sa iustice iustificante qui est esleuée à la dextre de Dieu.

Mais aussi sçachez, fideles, qu'il ne vous est plus permis de cheminer es tenebres du vice & du péché, depuis que la resplendeur de la gloire diuine luit sur vous à la dextre de Dieu: pensez vous viure comme de nuict lors que le Soleil luit sur vous en son midy? Non, non, *la nuict est passée & le iour est approché: rejettons donc les œuvres de tenebres & soyons reuestus des armes de lumiere. Cheminons honnestement comme de iour, non poine en gourmandises & yuongneries, non point en couches ny en insolences, non point en noises ny en enuie: mais soyons reuestus du Seigneur Iesus-Christ, & n'ayons point soin de la chair pour accomplir ses conuoitises.*

Ne cherche point, ô Chrestien, ta lumiere en la terre par la vanité de ce siecle: ta lumiere & splendeur est à la dextre de Dieu, c'est donc au Ciel qu'il te faut chercher tes vrayz honneurs, tes vrayz biens. Icy bas tu ne trouueras par effect que tenebres quelque beau lustre qu'ayent les biens & les honneurs de ce monde.

Et si nous voyons deuant nos yeux tenebres & obscurité d'aduersitez, prenons courage, puis que Iesus-Christ nostre lumiere la resplendeur de la gloire du Pere est à la dextre de Dieu; disons avec l'Eglise en Michée, *ne te resjouy point de moy, mon ennemie, car si ie suis tombée ie me releueray, si ie suis gisante en tenebres l'Eternel est ma lumiere.* Facent le monde & la mort leurs efforts, Iesus-Christ nostre lumiere est sorty de la mort, & est placé à la dextre de Dieu au dessus de tous efforts: il est vray que des broüillards nous enueloppent, mais ils seront dissipez, comme disoit Dauid, *l'Eternel fera reluire mes tenebres*, la lumiere s'est leuée en tenebres à ceux qui sont droicts. Il y a parfois des eclipses, mais elles ne sont pas entieres, car nostre Soleil est plus grand que la terre, il est plus grand que tous, & pourtant rien ne nous pourra

oster totalement sa lumiere: cette lumiere penetre dans les cachots & remplit de paix les ames fideles au milieu des plus espaisſes tenebres de la haine du monde. En somme le fidele regardant Iesus-Christ assis à la dextre de Dieu comme la resplendeur de la gloire de Dieu, dira avec Daud, l'Eternel est ma lumiere & ma deliurance, de qui auray-je peur? l'Eternel est la force de ma vie, de qui auray-je frayeur? Il dira en la mort, ie ne craindray point les tenebres du sepulchre, car ma lumiere luit és Cieux & Dieu l'a mise à sa dextre comme vn fanal afin que mon ame du milieu des anxietez & des tenebres de mort puisse se rendre au Ciel en regardant à Iesus-Christ.

Le second esgard auquel Iesus-Christ est monté au Ciel, est comme *souſtenant toutes choses par sa parole puissante*; Ce qui nous monstre la puissance de laquelle il regne & la vertu de laquelle il exerce son empire: Afin que d'une part nous considerions la force de ce sceptre qui brise ses ennemis, selon qu'il est dit Ps. 2. tu les froisseras d'un sceptre de fer, & les mettras en pieces comme vn vaisseau de potier: A raison de quoy il est dit la mesme, Maintenant donc, O Roys soyez entendus, Gouverneurs de

de la terre apprenez , baïsez le Fils de peur qu'il ne se courrouce, & que vous ne perissiés en ce train, quand sa colere s'embraſera tant soit peu. Et que d'autre part nous considérons la vertu de ce Roy à establir son regne en la terre sur les cœurs les plus endurcis, selon qu'il est dit Ps. 110. L'Eternel transmettra de Sion le sceptre de ta force disant, Seigneurie au milieu de tes ennemis. C'est la vertu par laquelle il abbat toute hautesse qui s'esleue contre sa cognoissance, & amene toutes pensées captiues à son obeyſſance. Considerons, mes freres, cette vertu de Iesus-Christ contre le peché, contre nos infirmités, contre tous maux, contre la mort meſme. Contre le peché, Car si nous sentons en nous son efficace, vne loy bataillant contre la loy de l'entendement si puissamment que nous perdions courage de la pouuoir vaincre, prenons courage en la vertu toute puissante de Iesus-Christ & de son Esprit, & l'implorons par prieres, & nous en sentirons finalement l'effect, & dirons que la loy de l'Esprit de vie qui est en Iesus-Christ nous a affranchis de la loy du peché. Contre nos infirmités, Car pourquoy est-ce que Iesus-Christ nostre Chef a en main cette vertu & puissance, que pour

la parfaire & exercer en nos infirmités, à ce que la parole toute-puissante nous soutienne lors que nous n'en pourrions plus? Contre tous maux, pource qu'il n'y a mal aucun qui ne cede à la parole de Iesus Christ: Les tempestes, la mer, les maladies iadis ont obey à cette parole, voire le neant en la creation, quel mal donc pourroit se presenter contre nous qui y resistast? Cette parole appelle les choses qui ne sont point comme si elles estoient, quel deffaut donc y aura-il en nous auquel elle ne subuienne? Contre la mort, pource que cette parole puissante viuifie les morts, comme elle viuifia le Lazare, & pourtant est-ce elle mesme qui ouvrira vn iour nos sepulchres, & qui accompagnera la trompette des Anges afin que nous ressuscitions des morts.

Le troisieme esgard selon lequel nostre Apostre considere Iesus-Christ assis à la dextre de Dieu, est qu'il a fait la purgation de nos pechez par soy-mesme: & cet esgard nous enseigne deux choses, à sçauoir la perfection de la satisfaction à la iustice de Dieu, Secondement l'acte de l'intercession, d'où prouient la perpetuité & fermeté de nostre iustification. Je dy la satisfaction, car iadis en l'ancien Testament (où tout estoit

plein des ombres dont le corps est en Christ) le souverain Sacrificateur ne pouuoit entrer au lieu tres-sainct deuant la face de Dieu qu'apres auoir offert sacrifice pour les pechez du peuple, & n'auoit entrée en ce lieu tres-sainct qu'en vertu du sang de la victime lequel il y portoit : Or ce lieu tres-sainct (comme le dit nostre Apostre au neuuiesme des Hebr.) estoit figure du Ciel ; partant cela monstroit que Iesus-Christ nostre souverain Sacrificateur deuoit offrir son sacrifice icy bas pour l'expiation des pechez deuant qu'entrer au Ciel dedans le Sanctuaire de Dieu ; Car le Ciel estât fermé aux pecheurs, Iesus-Christ sur qui, comme sur nostre pleige, Dieu auoit ietté l'iniquité de nous tous, n'y pouuoit entrer qu'apres auoir pleinement satisfait à la iustice de Dieu par son sacrifice ; c'est pourquoy Iesus-Christ dit Iean 16. *le saint Esprit redarguera le monde de iustice, pource que ie m'en vay au Pere* : de iustice, c'est à dire d'une entiere expiation du peché, pource qu'autrement il n'eust peu auoir entrée au Ciel vers le Pere celeste.

Venez donc pecheurs dont les consciences sont trauaillées du sentiment de vos pechez & de l'ire de Dieu, contempler le plus euident tesmoignage de vostre paix qui se puis-

se concevoir : Car l'ouverture des Cieux à vostre Pleige , & qui plus est , son establissement sur le throne de Dieu parle de soy & public que tout est deu au merite de sa mort. Aussi l'Apostre dit Hebr. 10. que nous auons liberté d'entrer és lieux saints par le sang de Iesus , par le chemin de qu'il nous a dedié frais & viuant par le voile , c'est à dire par sa chair.

Le dyseuement , que l'entrée de Iesus-Christ au Ciel à la dextre en suite de la purgation de nos pechez , nous enseigne que Iesus Christ est à la dextre de Dieu pour interceder pour nous : comme vous scauez que ce que le souverain Sacrificateur iadis entroit dedés le sanctuaire apres auoir offert le sacrifice , estoit afin d'interceder pour le peuple : à raison dequoy nostre Apostre dit au 9. des Hebr. *Christ n'est point entré és lieux saints faits de main qui estoient figures correspondantes aux vrayz ; ains est entré au Ciel mesme pour maintenant comparoir pour nous deuant la face de Dieu :* Et c'est cette intercession prise de la seance à la dextre de Dieu , par laquelle l'Apostre a fleure les fideles en termes si forts au 8. de l'Epistre aux Rom. *Qui est-ce , dit-il , qui condamnera ? Christ est celuy qui est mort*

*Et qui plus est ressuscité, lequel aussi est à la dextre de Dieu Et fait requeste pour nous, Quel autre intercesseur voulez-vous, ô Chrestiens, enuers Dieu que celuy qui est assis à la dextre de Dieu? Qui est-ce qui a cela de cōmun avec Iesus-Christ d'auoir fait la purgation de nos pechez? C'est pourquoy saint Iean disant que nous auons vn Aduocat enuers le Pere, à sçauoir Iesus-Christ le iuste, adiouste, qu'il est la propitiation pour nos pechez.*

Aussi de cette intercession & seance de Iesus-Christ à la dextre de Dieu resulte la perpetuité & fermeté de nostre iustification; cette presence de Iesus-Christ à la dextre de Dieu estant comme vne application continue que Iesus Christ nous fait du sang espandu en la croix; dont l'Ap. Hebr. 7. dit qu'il peut sauuer à plein ceux qui s'approchent de Dieu par luy, estant tousiours viuant pour interceder pour eux; & Rom. 5. il dit que si nous auons esté reconciliez à Dieu par la mort de son Fils, beaucoup plus estans desia reconciliez serons-nous sauuez par la vie d'iceluy.

D'abondant ie dy que cét esgard de Iesus Christ assis à la dextre de Dieu ayant fait la purgation de nos pechez par soy-

mesme, affermit toutes les consolations qui nous viennent de la puissance de son regne: Car que ne devons nous attendre de celuy qui nous a donné ce tesmoignage de son amour que d'auoir voulu respendre son sang & donner sa vie pour nous? cela ne nous certifie-il pas entierement qu'il veut rapporter tout ce qu'il y a de gloire & d'autorité à nostre bien & salut? Meditez cela, mes freres, au regard de la puissance que Iesus-Christ a d'exercer tout iugement: Craindrez vous d'auoir pour iuge & de voir venir és nuées du Ciel pour iuger les viuans & les morts, celuy qui a fait la purgation de vos pechez par soy-mesme? pourra-il vous condamner, vous ayant luy-mesme purifiez? à quelle fin peut-il venir que pour vous faire receuoir le fruiet de son amour, & l'esse& du sang qu'il a respendu pour vous?

Mais ie ne puis passer ces diuers esgards selon lesquels Iesus-Christ est monté au Ciel à la dextre de Dieu pour regner sur toutes choses, & notamment sur son Eglise, que ne me vienne en la pensée ce que disoit Gregoire premier Euesque de Rome escriuât contre Iean Euesque de Constantinople. Cét Euesque s'appelloit Euesque vniuersel, & il luy applique les paroles d'orgueil du Roy

de Babylon nommé Lucifer par Esaïe qui l'introduict disant chap. 14. *ie monteray au Ciel, i'exalteray mon throne par dessus les estoiles du Ciel, ie monteray sur la hauteur des nuées. Que sont, dit saint Gregoire à l'Euesque de Constantinople, tous tes freres les Euesques de l'Eglise uniuerselle, sinon les estoiles du Ciel, desquels la vie & la predication luisent parmy les erreurs & les pechez des hommes, comme parmy les tenebres de la nuit? Et pourtant pendant que tu ie veux preferer à eux par vn tiltre d'orgueil, & fouler leur nom aux pieds à comparaison du tien, que dis-tu autre chose, sinon ie monteray au Ciel & i'exalteray mon siege sur les estoiles du Ciel? N'est-il pas vray que tous les Euesques sont les nuées du Ciel qui par leur predication donnent la pluye à l'Eglise, & reluisent par la lumiere de leurs bonnes œuvres? Et pourtant pendât que tu les mesprises & les veux mettre sous toy, que dis-tu autre chose que ce qui a dit cet ancien ennemy, ie monteray sur la hauteur des nuées.* O qu'il eust pleu au Seigneur que les successeurs de Gregoire eussent bien pris garde à ce propos: & eussent reieté tous les tiltres & l'autorité que l'ascension & la seance à la dextre de Dieu don-

ne à vn seul Iesus-Christ, A sçauoir le tiltre de chef de l'Eglise, & l'autorité sur elle, veu que l'Apostre dit Ephes. 1. que Dieu ayant fait seoir Iesus-Christ à sa dextre, *l'a donné sur toutes choses pour estre chef à l'Eglise.* Qui est-ce donc qui peut prendre le tiltre que la seance à la dextre a donné à Iesus-Christ? Car si l'Apostre Hebr. 1. attribuë à Iesus-Christ l'honneur de la seance à la dextre, priuatiuement à toute creature, pour en prouuer la diuinité de Iesus-Christ, disant, auquel des Anges a-il dit, Sieds-toy à ma dextre? il s'ensuit que le tiltre & l'autorité que Iesus-Christ a obtenu par cette seance est incommunicable à toute creature.

Pleust à Dieu aussi qu'on eust considéré si l'exaltation de la nature humaine de Iesus-Christ à la dextre de Dieu s'accorde avec la doctrine de la transsubstantiation, par laquelle on pretend auoir icy bas dans des Ciboires ce propre & mesme corps, duquel l'Ecriture dit qu'il faut que le Ciel le contienne iusqu'à la restauration de toutes choses, comme aussi l'Apostre au 10. de cette Epistre dit que Iesus-Christ s'est assis *pour tousiours* à la dextre de Dieu, *attendant ce qui reste, à sçauoir que ses ennemis*

soient mis pour marchepied de ses pieds : employant ce mot , *pour toujours* , pour monstrier qu'il n'a plus de sacrifice à offrir , pource qu'il faudroit qu'il l'offrist hors du sanctuaire celeste ; or est-il pour toujours dans le sanctuaire celeste iusqu'à la consommation des siècles. Il me suffit de cette demonstration , afin que ie ne parle des infirmités & accidens peu honorables auxquels on assubjectit le corps glorieux de Iesus-Christ par la transsubstantiation. Certes ce corps est tellement resplendissant de gloire qu'il ne peut non plus estre caché que le Soleil : car si seulement pendant sa transfiguration en la terre sa face resplendit comme le Soleil , combien plus au Ciel dans la plénitude mesme ? Aussi est-ce pour la resplendeur de ce corps que Iesus-Christ en saint Matthieu 24. deffendant de croire qu'il soit en des cabinets , allegue pour raison , *que comme l'esclair paroist d'Orient en Occident , ainsi sera l'aduenement du Fils de l'homme* : car il est impossible que son corps paroisse hors du Ciel en l'estat de sa gloire , que ses rayons n'esclairent d'une extremité du Ciel à l'autre. Ne sert donc à nos Aduersaires de repliquer que telle est la volonté & la dispensation de Iesus Christ d'estre

*l'Ep. aux Hebr. ch. i. vers. 4. & 5.* 177  
d'estre sans aucune splendeur & gloire dans  
le Sacrement, comme il auoit bien voulu  
pendant son sejour sur la terre estre priué de  
la gloire qui luy appartenoit. Car cela est  
dire que Iesus-Christ depuis son Ascension  
à la dextre de Dieu a voulu continuer son  
aneantissement, ce qui est confondre l'estat  
de son humiliation avec celuy de son exal-  
tation, l'estat de ses miseres avec celuy de la  
remuneration. Aussi est remarquable la  
liaison des paroles de nostre Apostre, que  
Iesus-Christ apres auoir fait la purgation de  
nos pechez par soy-mesme, s'est assis à la  
dextre de la Majesté és lieux tres-hauts: en-  
tant que c'estoit pour faire la purgation de  
nos pechez par soy-mesme, qu'estoit requis  
l'estat d'humiliation & d'aneantissement,  
mais apres cela, deuoit auoir lieu l'estat de  
gloire.

Il faut donc que nous cherchions Iesus-  
Christ là où il est: comme iadis l'Eglise an-  
cienne disoit (ce qui est demeuré en l'Eglise  
Romaine à la conuiction,) *esleuez vos cœurs*  
*en haut, & on respondoit, nous les auons*  
*au Seigneur: & vous avez ouy souuent ce*  
*que dit vn Ancien à sçauoir saint Augustin:*  
*Tu dis, comment prendray-ie celuy qui est*  
*absent? comment enuoyeray-ie ma main au*

M

*Ps. 123.*

Reste pour la fin la circonstance du lieu de la seance de Iesus-Christ à la dextre de Dieu marquée en nostre texte par les mots *de lieux tres-hauts*, laquelle nous fournit aussi ses enseignemens, A sçauoir, 1. que nous sçauons où nous auons à regarder en nos maux, à sçauoir vers le Ciel, selon que disoit le Prophete, *I'esleue mes yeux à toy qui demeures és Cieux.* C'est de là d'où nous viendra toute bonne donation, & tout don parfait de par le Pere des lumieres, puis qu'il y a estably nostre chef & Mediateur à sa dextre. 2. Secondement nous contemplons par la seance de Iesus-Christ à la dextre de Dieu, les lieux tres-hauts, les Cieux comme le lieu de nostre demeure eternelle, selon que dit l'Apostre Hebr. 6. nous tenons l'esperance comme vne ancre ferme & seure de l'ame penetrant iusqu'au dedans du voile où Iesus-Christ est entré comme auant coureur pour nous. Car Iesus-Christ montant au Ciel nous a dit, *Je m'en vay à mon Pere & à vostre Pere, à mon Dieu & à vostre Dieu.* Je m'en vay vous preparer lieu. Pourtant sçauons nous que si cette loge de nostre habitation terrestre est de-

struicte nous auons vne maison eternelle au Ciel qui n'est point faite de main.

Mais, mes freres, prenons garde que nous ne rejections Iesus-Christ assis à la dextre de Dieu, par nos mœurs. Car qu'as-tu à faire de Iesus-Christ exalté à la dextre du Pere, toy qui ne cerches que les choses de la terre & la vanité de ce siecle? Quelle communion astu avec le Fils de Dieu esleué sur les Cieux? toy qui as ton cœur enfoncé dans le limon de ce monde par l'auarice, l'ambitiō, la pail-lardise, la gourmandise, & l'yurognerie? Tu voudrois vn Christ tout charnel & terrien dans les plaisirs, d'une vie animale & mondaine, au lieu que nostre Christ est au dessus du monde, ne viuant que d'une vie celeste & diuine.

Faut donc, mes freres, que si nous voulons auoir part à Iesus-Christ assis à la dextre de Dieu, nous nous resoluions de viure d'une vie celeste, c'est à dire, sainte, iuste, chaste, spirituelle, selon que dit l'Apostre au 3. de l'Epi-stre aux Philipp. *Nostre conuersation est de bourgeois des Cieux dont nous attendons le Seigneur & Sauueur Iesus Christ*, & au 3. aux Coloss. *Si vous estes ressuscitez avec Christ cherchez les choses qui sont en haut là où est Iesus-Christ à la dextre de Dieu.*

Pourquoy, mes freres, nous arrestons nous, à des biens & plaisirs perissables, puis que Iesus-Christ nous en prepare des parfaits & eternels en la dextre de Dieu? Pourquoy nous arrestos-nous à quelque gloire du monde qui est comme la fleur de l'herbe, puis que Iesus-Christ nous prepare vne couronne incorruptible de gloire? Regardons, mes freres, nostre frere aîné regnant à la dextre de Dieu pour nous faire part de ses biens & de sa gloire, afin que nous mesprisions celle que le monde nous presente : tout de mesme qu'un frere de Roy voyageant par vn pays estrange mespriseroit vne condition indigne de celle qui luy est preparée en son pais. Et si nous vsons de la sorte contre nos conuoitises de la seance de Iesus-Christ à la dextre de Dieu, elle nous remplira de consolation contre tous maux, par la gloire qu'elle nous donne dès à present, selon que dit l'Apotre Ephes. 2. que *Dieu nous a ressuscitez ensemble avec Iesus-Christ, & nous a viuifiez ensemble, & nous a fait seoir ensemble es lieux celestes en luy.* Amen.